



## CABDYL 2

### *Y Dubbey dy Yeir*

“**N**y s’quaaghey as ny s’quaaghey!” dyllee Ealish (va wheesh yindys urree as dy yarrood ee son tammylt yn aght dy loayrt Gailck vie). “Nish ta mee fosley magh goll rish yn fodreayrtan smoo va rieu ayn! Slane lhiu, chassyn!” (tra yeeagh ee sheese er e cassyn, v’ad sheiltyn dy ve ass shilley, bunnys, v’ad cheet dy ve cho foddey ersooyl). “Ogh, my chassyn beggey boghtey, quoi vees cur miu ny braagyn as oashyryn son euish nish, ta mee smooïnaghtyn, veen? Ta mee shicky nagh beam’s abyl shen y yannoo! Bee’m ro foddey ersooyl dy ve boirit my-nyn-gione: shegin diu jannoo chammah as oddys shiu - agh shegin dou ve kenjal roo,” smooinee Ealish, “er nonney foddee nagh jean ad shooyl yn raad ta mish laccal goll! Lhig dou smooïnaghtyn. Verym piyr noa dy vootsyn daue gagh Nollick.”

As ren ee goll er reaghey ree hene yn aght veagh ee jannoo eh. “Shegin da’n ymmyrkagh cur lesh ad,” smooinee

ish; “as nagh bee shen sheiltyn y ve aitt, dy ve cur giotyn da ny cassyn ayd hene! As nagh bee yn enmys jeeaghyn quaagh!

*Cass Yesh Ealish, Ooasle,  
Breshag-chiollee,  
faggys da’n Fendyr,  
(lesh graih Ealish).*

Atreih, cre’n boghtynid ta mee taggloo!”

Kiart ec y traa shoh, woail e kione noi clea yn halley: dy jarroo, v’ee beggan ny smoo na nuy trie er yrjid nish, as dy chelleeragh ghow ee yn ogher veg airhey as ersooyl lhee gys dorrys y gharee.

Ealish voght! V’eh ooilley v’ee abyl jannoo, as ish ny lhie er un lhiattee, dy yeeaghyn stiagh sy gharey lesh un tooill; agh dy chosney trooid, va shen ny smoo fardailagh na v’eh rieau: hoie ee sheese as ghow ee toshiaght dy cheayne reesht.

“Lhisagh oo goaill nearey jeed hene,” dooyrt Ealish, “innee vooar goll rhyt hene,” (v’ee kiart dy ghra shen) “as uss goll er keayne myr shoh! Cur stap nishtagh, ta mish dy ghra!” Agh, ny yeih, ren ee goll er, ceau galloonyn dy yeir, gys va dubbey mooar mygeayrt y mooee, mysh kiare oarlagh er diunid, as sheeyney lieh-raad sheese y halley.

